

DOMENIE IV DI PASCHE

Antifone di jentrade cf. Sal 32,5-6

Dal boncûr dal Signôr e je incolme la tiere;
cu la sô peraule a son stâts fats i cîi, aleluia.

Si dîs Glorie a Diu.

Colete

Diu onipotent e eterni,
meninus a spartî la gjonde dal cîl,
par che l'umil trop dai fedêi al rivi
là che lu à precedût la fuarce dal pastôr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 4,8-12

Diu al à fat Signôr e Crist chel Jesù che o vês metût in crôs.

Dai Ats dai Apuestui

In chei dîs, Pieri, incolm di Spirtu Sant, ur disè: «Caporions dal popul e sorestants, par vie che vuê o sin culî a rispuindi de opare fate a di un malât e di cemût che al è stât vuarît, o savarês ben ducj vualtris e dut il popul di Israel che chest om si presente vuarît denant di vualtris dome pal non di Jesù Crist il Nazaren, che vualtris lu vês picjât su la crôs e che Diu lu à risussitât dai muarts. Al è lui “la pierre che vualtris muradôrs le vês butade di bande e che e je diventade il cjantonâl”.

Parcè che in nissun altri no 'nd è salvece; no 'nd è altri non sot dal cîl dât ai umign che midiant di lui o podìn jessi salvâts».

Peraule di Diu.

SALM RESPONSORIÂL dal Salm 117

R. La pierre che i muradôrs le vevin butade di bande
cumò e je pierre di cjantonâl.

O ben:

R. Aleluia, aleluia, aleluia.

Laudait il Signôr, parcè che al è bon,
parcè che il so boncûr al è par simpri.
Al è ben lâ a parâsi tal Signôr,
miei che no stâ fidâts sui umign.
Al è ben lâ a parâsi tal Signôr,
miei che no stâ fidâts su lis potencis. **R.**

Ti ài agrât parcè che tu mi âs scoltât,
e tu sês stât la mê salvece.
La pierre che i muradôrs le vevin butade di bande
e je diventade il cjantonâl.
A fâ dut chest al è stât il Signôr;
e je une robonone pai nestris vôi. **R.**

Benedet chel che al ven tal non dal Signôr;
us benedìn de cjase dal Signôr.
Tu tu sês il gno Diu e ti ài agrât;
tu sês tu il gno Diu e ti laudi.

Laudait il Signôr, parcè che al è bon:
parcè che il so boncûr al è par simpri. **R.**

SECONDE LETURE 1 Zn 3,1-2

O viodarìn il Signôr come che al è.

De prime letare di san Zuan apuestul

Miei cjârs, ce sorte di amôr che nus à dât il Pari: di jessi clamâts fîs di Diu, e lu sin pardabon! Se il mont no nus cognòs al è parcè che nol à cognossût lui.

Miei cjârs, nô o sin za di cumò fîs di Diu, ma no si è ancjemò pandût ce che o sarìn. O savìn però che cuant che lui si sarà pandût, nô o sarìn sul so stamp, parcè che lu viodarìn come che al è.

Peraule di Diu.

CJANT AL VANZELI Zn 10,14

R. Aleluia, aleluia.

Jo o soi il bon pastôr, al dîs il Signôr;

o cognòs lis mês pioris e lis mês pioris mi cognossin me.

R. Aleluia.

VANZELI Zn 10,11-18

Il bon pastôr al rimet la vite pes sôs pioris.

Dal vanzeli seont Zuan

In chê volte, Jesù al disè: «Jo o soi il bon pastôr. Il bon pastôr al rimet la sô vite pes pioris. Il mercenari, invezit, che nol è pastôr e che lis pioris no son sôs, al viôt a rivâ il lôf, al implante lis pioris e al scjampe, intant che il lôf lis puarte vie e lis dispiert, parcè che al è mercenari e no si scompon pes pioris. Jo o soi il bon pastôr e o cognòs lis mês e lis mês mi cognossin me, come che il Pari mi cognòs me e jo o cognòs il Pari. E o rimet la mê vite pes pioris. E o ài altris pioris, che no son di chest sierai. Ancje chês o ài di menâlis dongje e a scoltaran la mê vôs e a saran un sôl trop, un sôl pastôr. Par chel il Pari mi vûl ben, parcè che o rimet la mê vite par tornâ a cjapâle di gnûf. Nissun no me cjol, ma jo le rimet di mê volontât. O ài il podê di rimetile e o ài il podê di tornâ a cjapâle di gnûf. Chest al è l'ordin che o ài vût di gno Pari».

Peraule dal Signôr.

Si dîs O crôt.

Su lis ufiertis

Danus la gracie, Signôr,

di indalegrâsi simpri cun chesj misteris di Pasche

in mût che ce che tu operis cence padin pe nestre salvece

nus fasi vê la gjonde eterne.

Par Crist nestri Signôr.

Antifone a la comunion

Al è resurît il bon Pastôr che al à rimetude la sô vite pes sôs pioris
e pal so trop si è indegnât di murî, aleluia.

Daspò de comunion

Signôr, bon Pastôr, cjale cun voli di afiet il trop dai tiei fedêi

e indegniti di compagnâ tai passons de eternitât

lis pioris sfrancjadis cul sanc tant preseât di to Fi.

Par Crist nestri Signôr.